

## *Nuusbrief van die Peter Henrich Henning Familiebond*

Wingerd 205  
Theewaterskloof Landgoed  
Villiersdorp

Posbus 121  
Villiersdorp  
6848

Tel: 028 840 0113

[www.henning.org](http://www.henning.org)

E-pos: [olie4@henning.org](mailto:olie4@henning.org)

*Verskyn vier keer per jaar: Februarie, Mei, Augustus en November*

## Ghoema Musiektoekennings: Francois Henning



Janina Oberholster, een van die aanbieders, oorhandig die Ghoema vir beste liedjie van die jaar aan Francois Henning

Sondagaand 23 April 2017 het die Ghoema musiektoekennings vir 2017 plaasgevind. Die Ghoemas is die enigste onafhanklike musiektoekennings vir Afrikaanse musiek. Hierdie jaar het dit by die Emperors Palace in Johannesburg plaasgevind, met Pieter Koen as hoofaanbieder.

**b5.c4.d4.e1.f7.g1.h2.Francois Henning \*22-12-1972** wat landwyd as Snotkop bekend staan, is in vier kategorieë benoem en het in twee van hierdie kategorieë met die louere weggestap, nl die gewildste liedjie van die jaar en die gewildste digitale liedjie van die jaar, met sy liedjie “Cool soos Koos Kombuis”. Die skrywers van die liedjie was Francois self, asook Adolf Vorster, Don Kelly en Dirk van Niekerk.

Hy is ook benoem vir die beste popalbum deur ‘n manlike kunstenaar met sy album HKGK en as beste manlike kunstenaar, maar hier het ander deelnemers die titel voor hom weggeraap.

Francois se lewenskragtigheid, ondeundheid, verhoogoptrede en die vreugde wat hy altyd uitstraal maak steeds van hom een van die mees gewilde kunstenaars in Suid-Afrika.

# Een van die Belowendste Tennisspelers in Suid-Afrika

Tydens die 2017 Suid-Afrikaanse tenniskampioenskappe vir juniors, wat gedurende April te Bloemfontein gehou is, het dit aan die lig gekom dat die Onder-18 seuns kampioen hierdie jaar **b7.c7.d10.e3.f1.g2.h1. Philip Barry Henning \*10-11-2000** is. Philip is steeds 'n onder-16 speler, maar het reeds sy ouer opponente die loef afgesteek.

Philip is een van die mees belowende tennisspelers wat Suid-Afrika nog opgelewer het. Hy het vanaf sy Onder-12dae gedurende 2012/13 uitsonderlik presteer en was die top gekeurde speler in al die ouderdomsgroepe waaraan hy deelgeneem het. Hy het nie net al die Suid-Afrikaanse ouderdomsenkelspeltitels verower nie, maar was ook 'n lid van die Suid-Afrikaanse spanne wat aan die Afrikakampioenskappe en ander internasionale toernooie deelgeneem het. Gedurende 2016 het hy as 'n O/16 speler deurgedring na die kwarteindrondte van die O/18 Afrikakampioenskappe. Afgesien van die Onder-18 titel wat hy nou verower het, het hy ook gekwalifiseer om aan die 2017 Junior Australiese Opekampioenskap deel te neem – 'n uitsonderlike prestasie om op so 'n jong ouderdom genooi te word om aan een van die “Grandslam” toernooie deel te neem.

Philip is 'n leerling aan Greykollege, Bloemfontein. Sy jonger broertjie, Gerard John \*26-3-2004 is net so 'n kranige sportman. Hy is die nr 2 gekeurde onder-12 tennisspeler in Suid-Afrika en het al aan verskeie internasionale ouderdomstennistoernooie deelgeneem. Hy is ook 'n uithaler hokkiespeler en is lid van die O/12 span van Suid-Vrystaat.

Die ouers van hierdie twee pragtige seuns is **b7.c7.d10.e3.f1.g2. Gerard Carel Henning** en sy vrou **Carlien Lize (gebore Fichardt)** van Bloemfontein. Pa Gerard het ook aan Greykollege gematrikuleer en verwerf daarna 'n ingenieursgraad aan die Universiteit van Stellenbosch. Hy werk tans by Vodacom en dien ook op die beheerliggaam van Greykollege.



**b7.c7.d10.e3.f1.g2. Gerard Carel Henning \*10-12-1971** en sy vrou **Carlien Lize (gebore Fichardt) \*1-1-1973** met hul twee seuns, **Philip Barry \*10-11-2000** en **Gerard John \*26-3-2004** wat uitsonderlik op sportgebied presteer

# Nog 'n Henning Sportman



**b10.c6.d1.e1.f2.g3.h1. Morné Henning van die Afrikaans Hoër Seunskool, Pretoria wat op akademiese – en sportgebied mooi presteer**

b10.c6.d1.e1.f2.g3. Herbus- en Christa Henning van Polokwane (Pietersburg) het vir ons laat weet van hul seun, Morné se prestasies. Morné Henning \*22-2-2003 (h1.) was tot aan die einde van 2016 in Oosskool (laerskool) in Polokwane. Aan die einde van 2016 het hy graad 7 geslaag en is nou in Afrikaans Hoër Seunskool (Affies) Pretoria en woon in die koshuis. Hy het gedurende sy skoolloopbaan tot dusver die volgende prestasies behaal :

1. Neem in 2012, 2013 en 2014 aan die SA landloop kampioenskap deel as lid van die Limpopo span. Hy behaal die negende plek;
2. 2015 neem hy deel aan interprovinsiale aksiekrieket en kry die toekenning vir brouer van die reeks.
3. Neem in 2016 aan SA atletiek kampioenskap deel as lid van die Limpopo span. Behaal 8ste plek in 800m en 9de plek in 1500m.
4. 2016 gekies vir Limpopo

Bloubulle rugby span vir die Nashua week in Sasolburg. Hy dien as onderkaptein en word in een van die wedstryde as speler van die wedstryd aangewys.

5. 2016 gekies vir Limpopo krieketspan, die Impalas. Neem deel aan die Momentum week in Kaapstad.
6. Verwerf ook akademiese erekleure in 2012, 2013, 2014 en 2015.
7. Word ook in 2016 aangewys as die skool se rugbyspeler van die jaar.
8. 2017 by Affies. Verwerf erekleure vir atletiek 800 en 1500m.

By al die mooi prestasies bly hy 'n pragtige gehoorsame nederige seun.

## Bulletjie Rugby

Ons het hierdie pragtige foto van b6.c3.d3.e4.f2.g6.h3.i1.j1. Marchandt Henning \*Pretoria 7-9-1999 waar hy Bulletjie rugby gespeel het, van sy oupa, Jan Albert Henning van Uvongo ontvang.



## Kranige langafstand atleet



Ina Henning, vrou van b1.c8.d6.e5.f4.g1. Johannes Petrus (Johan) Henning wat 'n kranige ultra langafstandatleet is. Hier staan sy met die trofee as die eerste vrou wat tien agtereenvolgende Washie Ultramarathonne voltooi het

Ons het onlangs 'n groot klomp bywerkings by die nasate van b1.c8.d6.e5.f4. Johannes Petrus Henning, gebore 27-2-1928 en sy vrou Anna Magrieta Susanna gedoen. Jannie en Anna was self kranige jukskeispelers, wat jare lank die Vrystaat tydens nasionale toernooie verteenwoordig het. Jannie was ook 'n groot duiweboer wat baie pryse op skoue en tydens wedvlugte verower het.

Hulle seun, Johan (ook Johannes Petrus) \*27-11-1950 se vrou, Ina (Magdalena Johanna Hermina, gebore Van Staden) gebore 20 November 1957 van Ficksburg is egter die groot atleet van wie ons wil vertel. Ina het die

Comrades Marathon reeds 18 keer voltooi! 'n Merkwaardige prestasie! Sy het ook die Washie Ultramarathon oor 100 myl (160 kilometers) reeds 12 keer voltooi, waarvan 10 agtereenvolgens was. Sy is die eerste vroue atleet wat die "Goueskoen trofee" verower het, met die voltooiing van haar tiende Washie wedloop. Sy is ook die vrou met die meeste Washie wedlope agter haar naam.

Ina het ook aan verskeie ander ultramarathonne deelgeneem, soos die Twee Oseane Marathon, City-to-City en die Karoomarathon, wat sy reeds twee keer gewen het.

## Ou Interessante Henning Familiefoto

Onlangs maak 'n vriend my daarop attent dat daar 'n baie interessante foto van 'n Henning familie op die Erfenisstigting se Facebookblad verskyn. Ek het onmiddelik gaan kyk. Die volgende was by die foto geskryf:

**Pieter Henning het hierdie unieke familiefoto van sy voorouers vir ons gestuur. Dis kort na die ABO op 'n plaas in die Suid-Vrystaat geneem - let op die modderhuis en die boomstomp links was die boom wat saam met die plaashuis afgebrand is. b1.c6.d4.e6. Oupa Jan Willem Rudolph Henning en ouma Hester (Terreblanch) staan regs agter en langs Ouma is haar identiese tweelingsuster. Voor in die middel is b1.c6.d4. oupagrootjie Theuns Frederick Phillipus Henning en langs hom Oumagrootjie Magdalena Elizabeth Martina Stoffelina (gebore Wilkens). (Dis ongelukkig al inligting waaroor Pieter beskik.)**

Hier was vir my 'n groot uitdaging! Ek moes hierdie foto deeglik ontleed en probeer vasstel wie al die mense op die foto is en wanneer en waar dit geneem is. Ten spyte van die feit dat die naam Pieter Henning die mees algemene voornaam onder Henning



mans is, kon ek vinnig dié betrokke Pieter opspoor – b1.c6.d4.e6.f2.g2. Pieter Abraham \*16-10-1941. Ons het juis in die vorige nuusbrief (130 van Mei 2017) ‘n foto van hom en sy gesin gepubliseer, hoewel nog nie een van hierdie familie by die familiebond aangesluit het nie.



Nadat u goed na die foto gekyk het, vergelyk die twee ou mense links voor op die foto met die foto van b1.c6.d3. Pieter Hendrik Henning \*30-7-1840 en sy vrou Maartjie, hier onder. Ons is van mening dat dit dieselfde mense is. Die onderste foto is geneem toe hulle jonger was



Ek het die foto baie fasinierend gevind en kon die volgende puntjies van kommentaar lewer:

1. As die foto op oupagrootjie Theuns Frederick Philippus Henning se plaas geneem is, was dit natuurlik op die plaas Heuningkrans in die Rouxville distrik.
2. Ek aanvaar dat Pieter met die term “kort na die ABO” die tydperk ongeveer 1902 tot 1904 bedoel. Die kleredrag van die mense op die foto is tipies van daardie tyd.
3. Die huis in die agtergrond is sonder dak, maar daar is geen tekens van brandmerke aan die bokant van die mure nie, om aan te dui dat die dak (heel moontlik ‘n grasdak) kort tevore gedurende die ABO aan die brand gestee is. Die huis is wel gedurende die ABO afgebrand, dus is ek van mening dat die foto later as 1904 geneem is en reën die brandmerke al afgewas het.
4. Pieter se oupa, Jan Willem Rudolph Henning, wat regs agter staan, is in 1885 gebore. As die foto ongeveer 1902 tot 1904 geneem is, was hy slegs 17 tot 19 jaar oud en nog nie getroud nie. Die persoon op die foto lyk of hy daardie ouderdom of

moontlik 'n bietjie ouer kon gewees het. 'n 17 – 19 jarige jongman sou maar sukkel om reeds so 'n lekker snor te kon gehad het, terwyl 'n jong man van 20 – 21 jaar oud wel reeds so 'n lekker snor kon gekweek het. Dit versterk dus my vermoede dat die foto later as 1904 geneem is.

5. Jan Willem Rudolf se vrou, Hester Johanna, is in 1889 gebore. Sy (en haar tweeling suster) moes dus tussen 13 en 15 jaar oud gewees het, as die foto tussen 1902 en 1904 geneem is. Volgens hedendaagse standaarde lyk die tweeling beslis ouer as 13-15 jaar, maar dit is 'n feit dat meisies in daardie dae baie jonger getrou het en hul kleredrag hulle ouer laat lyk het. Daar bestaan dus 'n mate van twyfel by my of dit werklik Hester Johanna en haar tweeling suster is. As dit wel die tweeling is en die foto is 1902 – 1904 geneem, was hulle nog nie getroud nie. Jan Willem Rudolf en sy vrou se eerste kind is eers in 1907 gebore. Gewoonlik is egpare se eerste kind tussen 10 maand en 1½ jaar na die huwelik gebore.
6. Aanvanklik het ek gedink dat die twee dogtertjies wat voor hulle op die grond sit, hulle kinders moes wees, maar met bogemelde verduideliking is dit nie moontlik nie. Hulle eerste twee kinders was in elk geval seuns, waarvan die oudste eers in 1907 gebore is. Hierdie dogtertjies is dus in alle waarskynlikheid kinders van een van die egpare wat agter staan. In alle waarskynlikheid die egpaar wat net links van oupa Jan Willem Rudolph staan (die man hou hul jongste kind in sy arms vas). Die dogtertjies sit by hulle ouma se voete;
7. Ek het deur die Terblanche geslagsregister gewerk om te sien of ek Hester Johanna se pa kan identifiseer, maar ongelukkig is hierdie familie nie opgeneem in die geslagsregister nie. Daar is wel 'n groep Terblanche's wat laat 19de eeu in die Rouxville distrik gewoon het en die naam Salomon Johannes kom wel voor, maar nie een wat Hester Johanna (sy is in 1889 gebore) se pa kon gewees het nie. Dit is duidelik dat hierdie tak van die Terblanche familie nie volledig gedokumenteer is nie.
8. Ek het vermoed dat die ou mense wat links voor op die foto sit, familie van oupagrootjie, Theuns Frederick Philippus Henning (\*1842) moet wees. As mens na die foto van sy ouer broer, Pieter Hendrik Henning \*30-7-1840 en sy vrou kyk, wat ek op die vorige bladsy vertoon, lyk dit nogal of dit hulle kan wees. Hierdie familie het op die plaas Palmietfontein, Rouxville gewoon. As mens die ouderdomme van die twee egpare skat, lyk dit of Theuns Frederick Philippus ouer as die ander man is, maar dan lyk hy baie ouer as die 60- 62 jaar wat hy in 1902 – 1904 was, terwyl die man links wel lyk of hy 62 – 64 jaar (of selfs 65/66 jaar) oud kon gewees het, wat Pieter Hendrik (\*1840) op daardie stadium was.
9. Dit lyk of dit twee egpare en hulle kinders is wat in die agterste ry staan. Die dogtertjie wat voor by (in alle waarskynlikheid) haar ouma staan, lyk of sy een van die drie kinders van die egpaar heel links is. Hulle twee ouer seuns staan langs hulle pa. Hierdie gesin is in alle waarskynlikheid kinders en kleinkinders van Pieter Hendrik en sy vrou, terwyl die egpaar in die middel, met hul dogtertjie in die pa se arms en die twee dogtertjies wat by hul ouma se voete sit, kinders en kleinkinders van Theuns Frederick Philippus was.
10. As hierdie afleiding korrek is, het ek probeer kyk wie by hierdie prentjie inpas. Nie een van Pieter Hendrik se seuns en hulle kinders pas in nie, maar dit kan een van drie dogters en hulle gesinne wees. In die geval van Theuns Frederick Philippus pas

nie een van sy seuns en hulle kinders by hierdie prentjie in nie. Dit laat ons slegs met sy dogter, b1.c6.d4.e3. Maria Catharina gebore 2-1-1872 en ongelukkig het ek geen verder besonderhede van haar eggenoot en kinders nie. Alles inaggenome, glo ek dat dit Maria en haar familie is.

Wat wel vir my duidelik is, is dat die foto 'n paar jaar later eers geneem moes gewees het en nie so vroeg as 1902 – 1904 nie. Ek skat ongeveer 1906, want dit moes voor die geboorte van oupa Jan Willem Rudolph se eerste kind in 1907 gewees het en voordat ouma Hester Johanna verwagting geraak het. As my vermoede dat die egpaar links voor, Pieter Hendrik en sy vrou, korrek is, kan die foto natuurlik ook op sy plaas, Palmietfontein geneem gewees het en nie noodwendig op Heuningkrans, die plaas van Theuns Frederick Philippus nie, maar die feit dat oupa Theuns en sy vrou reg in die middel van die foto sit, glo ek dat die foto op sy plaas, Heuningkrans geneem is.

Gelukkig kon ek Pieter Henning se seun Sollie (Salomon Johannes) se E-Posadres in die hande kry en my kommentaar vir hom stuur. Ek het ook gevra waarom hulle die foto vir die Erfenisstigting gestuur het. Sollie het die volgende verduideliking gegee:

*“Tydens ons gesin se kuier by my ouers in Pretoria in Desember 2016 het ek en my gesin die Voortrekkermonument besoek. Daarna het my jongste, Christiaan (b1.c6.d4.e6.f2.g2.h1.i2), sy oupa (my pa) gevra om vir hom 'n ossewa te bou. My pa wou egter die werklike afmetings van 'n ossewa hê en so het hy in kontak gekom met die Erfenisstigting. Hulle antwoord toe dat hulle werkstekeninge het en dat hy dit moet kom haal.*

*Die stigting het toe genoem dat as Pieter inligting oor sy voorouers wil hê, sal hulle navorsing doen en aan hom deurgee. Dit is toe dat hy besluit het en die foto gestuur het. Hulle het toe Pieter se toestemming gevra om die foto op facebook te sit wat hy natuurlik gegee het. Pieter sê dat hy nie kan glo dat die foto soveel aandag geniet nie.*

*Ter afsluiting heg ek 'n foto aan van die eindproduk wat Christiaan se oupa vir hom gemaak het. (Ek moet ook byvoeg dat ouma Jeanetta die wa se seil gemaak het).”*



## Foto van Gerrit Frans Henning

Ons het 'n Vonkposbrief van 'n Carl Muller ontvang in verband met die foto van b5.c5.d6.e3. Gerrit Frans Henning, gebore Junie 1877 wat in die Henning Famileiekroniek opgeneem is. Gerrit Frans Henning is die enigste Henning wat in die negentiende eeu 'n beroepsoldaat geword het. Hy het reeds op 1 Junie 1896, by die nuutgestigte Staatsartillerie van die Zuid-Afrikaansche



Ons het nou die name van al drie artilleriste van die ZAR Staatsartillerie, nl b5.c5.d6.e3. Gerrit Frans Henning, gebore Junie 1877, links voor, Jan Grabe regs voor en Ignatius Johannes Jacobus (Natie) Muller agter

Republiek aangesluit. Vanaf September 1898 tot Januarie 1899 was hy een van die artilleriste wat deelgeneem het aan die Magato ekspedisie. Op 21 Maart 1899 is hy na die rang van korporaal bevorder en gedurende die Anglo-Boereoorlog neem hy deel aan gevegte te Dundee, Ladysmith, Tugela, Spioenkop, Moledrif, Bosrant, Tafelkop, Rietspruit, Kliprivier, Donkerhoek, Dalmanutha en verskeie ander gevegte. Hy word ook na die rang van Opperwachtmeester (die ekwivalent van vandag se Sersant-Majoor) bevorder.

Op die foto, verskyn drie artilleriste waarvan ons twee kon identifiseer, nl Gerrit Frans Henning (links voor) en Jan Grabe (regs voor). Carl Muller het nou vir ons laat weet dat die persoon agter, sy oupa Natie (Ignatius Johannes Jacobus) Muller is. Mnr Muller het sommer 'n paar ander foto's van sy oupa aangestuur om te bewys dat dit wel sy oupa op ons foto is.

Ons het die nodige byvoegings op die foto in die familiekronek gemaak.



Maria Petronella (Piemp) Henning (gebore Alers) \*25-5-1922 op haar 95ste verjaardag saam met haar skoonsuster, Lena en dié se dogter, Magda

## 95ste verjaardag van Maria Petronella Henning

b9.c3.d3.e3.f2.g9.h3.  
Magdalena Jacomina Maria (Magda) Human (gebore Henning)\*21-5-1961 het vir ons twee foto's gestuur wat op die vyf-en-negentigste verjaardag van haar tannie Piemp Henning (Maria



Petronella, gebore Alers) gebore 25 Mei 1922 geneem is. Tannie Piemp is die eggenote van wyle b9.c3.d3.e3.f2.g5. Hendrik Jacobus Henning \*3-11-1924. 'n Groot groep susters en niggies het haar gaan gelukwens met haar verjaardag. Sy woon in Fochville.



'n Mini Henning familiefees. Al die susters en niggies wat tannie Piemp se 95ste verjaardagpartytjie bygewoon het: Agter v.l.n.r: Koekie Viljoen, dogter van Jan Viljoen en sy vrou b9.c3.d3.e3.f2.g7. Machiel Nicolaas (gebore Henning); b9.c3.d3.e3.f2.g5.h3. Elsie Magrietha Jacoba, dogter van Piemp; Magdalena Jacomina Maria (Lena) Henning (gebore Havenga) vrou van Andries Gerhardus (g9); Adriana Johanna Catharina Henning \*4-1-1963, getroud Broxham (dogter van Lena en suster van Magda); Petronella Cornelia Henning \*2-5-1955 , getroud Nicolaas Meiring; Jessica Broxham, D/v Adriana. Voor v.l.n.r Trish Viljoen, dogter van Koekie Viljoen en Magdalena Jacomina Maria (Magda) Human (gebore Henning) wat die foto's vir ons gestuur het

## Henning Webwerf

Diegene wat die Henning webwerf op Internet ([www.henning.org](http://www.henning.org)) oor die afgelope tyd besoek het, sou gesien het dat ons nou ook gegewens oor twee Britse Henningstamme vertoon. Bondsekreteraris, Olivier Henning het oor die afgelope paar jaar aan hierdie dokument gewerk en dit onlangs voorberei om op die webwerf te vertoon.

Ons dek dus nou al die Henningstamme in Suid-Afrika, twee Duitse stamme, twee Nederlandse stamme, twee Engelse stamme, die Henning stam van Estland (Estonië) en dele van 'n Australiese stam

Verskeie Hennings van die Verenigde State van Amerika doen van tyd tot tyd navraag of ons enige gegewens oor hulle voorsate het, maar ons antwoord is altyd dat ons bereid is om hulle geslagsregisters op ons webwerf te vertoon, mits hulle self die nagevorste gegewens verskaf.



## 60ste Troudagherdenk ing

Die Voorsitter van die Henning Familiebond b7.c8.d8.e1.f5. Gideon Stephanus (Giep) Henning, gebore 10 Oktober 1935 en sy vrou Wena (Johanna Wilhelmina Catharina) (gebore Dippenaar) gebore 19 Februarie 1936 het op 6 April 2017 hul sestigste troudagherdenking gevier.

Hulle kinders het 'n heerlike skaapbraai vir al hul familie en vriende gereël. Drie van Giep en Wena se vriende wat ook bygewoon het, het ook hul sestigste troudagherdenkings gedurende 2017 gevier, wat die viering nog meer spesiaal gemaak het.

## Huwelike

**b1.c8.d6.e5.f4.g1.h3. Frederick Gerhardus (Gerhard) Henning \*8-7-1981 en Vicky Botha \*18-3-1984** is op 25 Maart 2017 by die NG Kerk, Heuvelkruin, Bloemfontein in die huwelik bevestig. Gerhard is die seun van Johan en Ina Henning van Ficksburg. Vicky se ouers is, Hennie en Elsabe Botha van Bloemfontein.

Gerhard is 'n finansiële adviseur vir Momentum in Bloemfontein en Vicky 'n onderwyseres by Fona Pre-primêreskool in Bloemfontein. Die onthaal het plaasgevind by Oliewenhuis te Bloemfontein.





Ons het ook verneem van die huwelik van **b6.c1.d3.e5.f3.g3.h3.i1. Jopie Josef Jooste Henning \*15-1-1993 op 15 April 2017 te Franschhoek met Marníce Oberholzer \*7-9-1994.** Jopie is die seun van Gerhardus Lourens Henning en sy vrou Irma van Potchefstroom. Marníce is die dogter van Stefanus Marius Oberholzer en sy vrou Corrie Bernice (gebore Raubenheimer).


Jopie studeer besigheidsbestuur en Marníce is besig om haar as geneesheer te bekwaam. Hulle gaan in die Wes-Kaap vestig.



Marníce Oberholzer kom saam met haar pa op 15 April 2017 by die kerk aan op Franschhoek, waar sy in die huwelik bevestig is met **b6.c1.d3.e5.f3.g3.h3.i1. Jopie Josef Jooste Henning \*15-1-1993**



# Sterftes



**Roelf Johannes Hendrik (Roelf) Swanepoel \*22-4-1952** eggenoot van Karin Maria (gebore Henning) wat gedurende 2016 oorlede is. Ons sal hom onthou as een van die perderuiters wat gedurende die 1988 Henningfees aan die optog deur die strate van Aliwal-Noord deelgeneem het

**b5.c1.d3.e1.f7.g1.h2. Karin Maria Swanepoel (gebore Henning)** (dogter van Jan Andries Henning, die eerste voorsitter van die Henning Familiebond) het vir ons laat weet van die afsterwe van haar man, **Roelf (Roelof Johannes Hendrik) Swanepoel** gedurende die aand van 27 Maart 2016. Karin het haar spyt uitgespreek omdat sy ons nou eers laat weet het, omdat sy nog steeds sukkel om sy dood te verwerk en te verwoord. Hy was die middelpunt van haar lewe. Hulle het mekaar vier-en-veertigjaar lank geken en was veertigjaar lank getroud.

Roelf is op 22 April 1952 te Steenbokpan, naby Ellisras in Limpopo gebore. Hy was op laerskool te Steenbokpan, maar het sy hoërskoolloopbaan by die Brits

Landbou Hoërskool voltooi. Op 6 September 1975 trou hy en Karin Henning en uit hulle huwelik is drie kinders gebore. Hy was 'n wonderlike eggenoot, pa, oupa en vriend. Hy word oorleef deur sy vrou, Karin, drie kinders en skoonkinders, agt kleinkinders, twee broers en twee susters.

Met sy dood het Roelf vir Rotek Ingenieurswerke gewerk as Turbine – aanlegbestuurder. (Turbine Plant Manager). Hy sou gedurende April 2017 afgetree het. Roelf is oorlede aan 'n rare bloedkanker genaamd Multiple Myeloma. Buiten allergiese asma, was hy sy hele lewe lank 'n gesonde man. Hulle was in Junie 2015 in Namibië waar hy die duine plat gery het op 'n 'quadbike' en die bekende “Duin Sewe” vir die lekker twee maal na mekaar op en af geklim het, en dit op 63 jarige ouderdom. Tydens 'n bloedtoets, wat in Oktober 2015 gedoen is, en nog ander mediese toetse is die amper simptoomblose, pynlose siekte opgespoor. Nie eens die beste behandeling wat in SA beskikbaar is, en wat hy ontvang het, kon sy lewe verleng nie. Hy is binne 6 maande oorlede.

**Dan het ons ook verneem van die tragiese dood van b1.c8.d6.e8.f1.g3. Jozef Hendrick Henning \*11-3-1956.**

Jozef voltooi sy skoolopleiding aan die Afrikaans Hoër Seunskool Pretoria. Hierna begin hy met Teologiese studies aan die Universiteit van Pretoria, maar staak sy studies kort daarna. Jozef was die derde oudste van vier broers. Soos dit maar is, het elkeen sy eie pad gekies nadat hulle getroud is. Jozef en sy eggenote het in Randhart,





**b1.c8.d6.e8.f1.g3. Jozef Hendrick Henning \*11-3-1956 wat op 5 Mei 2017 geweldig by sy woning vermoor is**

Alberton gebly waar hy as makelaar vir die bemaking van lewensversekering gewerk het. Gedurende Junie 1977 word hul enigste seun gebore.

Jozef dien gedurende die 1980's en tot 1997 op die bestuur van die Henning Familiebond. Hy was een van ons staatmakers, wat altyd bereid was om sy deel te doen.

Hy en sy vrou, Lyndy het Suid-Afrika in 2010 verlaat en hulself op die Karibiese eiland, Antigua gaan vestig, waar hulle saam met Lyndy se kinders uit 'n vorige huwelik gaan woon het. Die rede vir hulle verhuising was dat hulle veiligheid in gedrang was nadat hulle bure in Alberton aangeval is. Jozef het weer gedurende September 2016 na SA teruggekeer, waar hy besig was om 'n besigheid te begin. Sy vrou sou eers later na SA terugkeer nadat hy 'n huis en sekuriteit vir haar kon verseker. Jozef was baie opgewonde om weer 'n werk in Suid-Afrika te kry. Hy het net goeie dinge oor Suid-Afrika te sê gehad. Hoe hartseer is dit dat 'n man met soveel hoop terugkeer na SA en op 'n gewelddadige manier sy lewe moes verloor.

Jozef het weer in Alberton gebly, maar intussen na 'n huis op Henley-on-Klip by

Meyerton verhuis. Jozef was op Vrydag 5 Mei 2017 op pad huis toe en by die huis aangekom was hy ingewag deur inbrekers/rowers wat hom brutaal vermoor het. Die motief vir die moord is onbekend, maar dit wil voorkom of dit roof was. Jozef is die tweede persoon wat op die bestuur van die familiebond gedien het, wat vermoor word. Die eerste was b7.c8.d5.e10.f2. Olivier Henning en sy vrou Suzette wat op 20 April 2008 by hul huis in Kemptonpark vermoor is.

## Geldsake

Vir etlike jare reeds oorleef die Henning Familiebond slegs op die donasies wat ons van goedgesinde Hennings ontvang. Inderwaarheid het ons so goed gedoen dat ons selfs kon deelneem aan projekte van kultuurorganisasies, soos die FAK, Erfenisstigting en Oorlogsmuseum van die Boererepublieke wat ook die geskiedenis en kultuur van die Henning familie herdenk. Met die opstel van die familiebond se finansiële state vir 2016 het dit eger duidelik begin word dat 'n paar rooi ligte begin flikker.

As mens oppervlakkig na hierdie 2016 state kyk, wil dit steeds lyk of dit op finansiële gebied goed gaan met die familiebond. Ons inkomste vir die jaar was immers R9 052.00

meer as ons uitgawes. As mens dieper kyk, sien mens gou dat R6 468.00 van hierdie R9 052.00 rente was wat ons op ons spaargeld verdien het. 'n Nog dieper ondersoek wys uit dat as ons die paar baie groot donasies (R1 000.00 of meer) ook buite rekening laat, dat ons inkomste inderwaarheid veel kleiner as ons uitgawes vir die jaar was. Gedurende 2016 het veel minder mense donasies as in die verlede vir ons gestuur.



Vir die jaar 2017 lyk die situasie nog slegter. Oor die afgelope drie maande het slegs die ses lede wat met 'n maandelikse debietorder bydra en mev Marlene Page (gebore Henning) van Polokwane vir ons 'n bydrae gestuur.

Ons wil werklik 'n beroep op al ons Hennings doen om dit te oorweeg om van tyd tot tyd 'n donasie vir die familiebond aan te stuur. U besluit self wat u kan bekostig.

**Die besonderhede van die familiebond se lopende bankrekening is as volg:**

**FNB Villiersdorp (Tak 200 712); Rekeningnaam – Henning Familiebond; Rekeningnommer – 6265 7601 483. Gebruik asseblief u voorletters en van, en as dit moontlik is, u lidnommer as verwysing wie die deposito gemaak het.**

As u sou belangstel om 'n afskrif van die 2016 finansiële state te ontvang, kontak gerus die Bondsektaris per E-Pos – [olie4@henning.org](mailto:olie4@henning.org)

## Henning Aandenkings

Ons het steeds die volgende Henning aandenkings beskikbaar. U kan telefonies (028 840 0113 of sel 082 355 3801) of per E-Pos ([olie4@henning.org](mailto:olie4@henning.org)) bestel. Ongelukkig word posgeld volgens die gewig van die pakkie bygevoeg, dus sal ons u eers in kennis stel hoeveel die posgeld sal bedra, voordat u die geld in die Familiebond se rekening deponeer. Rekening besonderhede: **FNB Lopende rekening 6265 7601 483; Tak nr 200 712. Rekening naam – Henning Familiebond. Vermeld u lidnommer en/of voorletters en van as verwysing**

1. Teelepels — R50.00 elk (goud geplatteer) **Pragtig as 'n stel van ses of meer, saam met 'n suikerlepel**, of individueel in 'n teelepel versameling
2. Suikerlepels (goud geplatteer) — R54.00 elk
3. Lapelwapens — R30.00 elk
4. Mansjetknope — R100.00 stel. **Werklik pragtig! Kan met trots gedra of in 'n vertoonkas vertoon word. Sal ook 'n mooi erfstuk word**
5. Skryfblokke (50 bladsye) — R30.00 elk
6. Henning CD — R125.00 elk plus R10.00 posgeld
7. Doen eers navraag wat u pakkie se posgeld sal bedra voordat u enige geld inbetaal. Onthou ook dat as u wil hê dat ons die pakkie met geregistreerde pos stuur, dit 'n ekstra R30.00 sal kos.